

■ CONVIVENZA

Tranter pulvra, plunder e regurdanza

DA FADRINA HOFMANN*

Fin d'emna ed i plova, plievgia d'atun. Jau hai gugent quell'atmosfera, sch'i plova dadora a tschiel rut ed jau poss seser en stiva chauda sin cutschi, baver in cuppin cacau e leger la gassetta u in cudesch gross. Ma oz stoss jau far in sforz e nizzegiar l'aura da plievgia per far urden sin palantschin. Igl è super d'avair in dachasa cun in grond palantschin, ma in grond palantschin vul adina era dir: Bler spazi per deponer plunder. Jau vom cun pauc elan si da stgala, mes chaun m'accumpogna sco adina. Entant ch'jau cumenz a strair natiers chistas da bananas e satguns dad Ikea fa Milo urden en sia maniera: El maglia las mustgas mortas e mez mortas che giaschan giun plaun. Quai fa el cun gronda passiu ed anc pli grond delizi.

Mes gust è limità, ma i na dat nagut auter ch'entschaiver ina giada cun rumir. Jau less gist atatgar la chista cun decoraziuns da Nadal cura ch'jau ves mia veglia tastga dad Adidas tranter las stgatlàs da chartun. Igl è ina tastga da tgirom neonoranscha ed jau sai gia tge che ma spetga dadens: Il vestgì da judo. E las tschintas: In'alva, ina melna, in'oranscha. Tge pitschen vestgì! Jau aveva



diesch onns cura ch'il magister ha bandunà Scuol e nus minijudocas essan restads enavos senza remplazament. Donn, a mai placheva quest sport da combat giapunais zunt bain. Jau ma regord anc exactmain dal local da protezzion civila nua che nus exercitavan sin matratschas. Jau ma regord schizunt da la savur da pes en quest local. Cun in surrir pleg jau puspè il vestgì da judo ed al met en la tastga dad Adidas. Entant vala quella tastga sco retro. Sin Ricardo survegniss jau segir in bel rap per quest exemplar.

Jau ser il zip e stoss pensar anc ad in'anecdota en connex cun judo. Il magister aveva bain ditg a nus da betg trenar quai che nus emprendian da judo er a chasa u sin piazza da scola. Ma jau aveva in tal plachair da l'uki goshi – in moviment dal chalun che bitta l'auter per terra – ch'jau vuleva mussar quel er a mia famiglia. Jau hai damai rimnà tut las cuver-

tas da letg en nossa chasada per «segirar» noss corridor. Jau hai clamà mes frar che s'ha laschà cumprar cun in Twix – che sa numnava quella giada anc Raider – per esser mes adversari. Lura hai jau radunà tut la famiglia inclusiv tatta per la gronda represchentaziun da la stupenta judoca Fadrina Hofmann. L'uki goshi è gartegià perfetgamain. Che mes frar è platgà gist dasper las plimas da letg ed ha en pli er anc rut il bratsch, quai n'era a mes avis ussa propi betg mes sbagl. In'emna n'ha mes frar betg pli discurre cun mai ed anc oz raquinta el da quel mument traumatic cun sia sora «violenta».

Basta, atgnamain er'jau vegnida sin palantschin per far urden. Ma sco da prevesair chat jau adina puspè insatge plain regurdientschas: Il vegl walkman blau cler che cuntogna anc la cassetta da Boney M u il purtret malegià mezza ch'aveva survegnì la nota 6, ma ch'era stà me-mia frivol per mussar a l'exposiziun da scola. E lura avr jau la gronda trucca da lain plain diaris vegls... Il rest dal suentermezdi passent jau cun leger mias «memuaras». L'unic ch'ha propi fatg urden sin palantschin è per finir mes chaun Milo.

* Fadrina Hofmann è redactura tar la «Südostschweiz» e viva cun sia famiglia a Scuol.